

CONVENIO ENTRE A VICEPRESIDENCIA PRIMEIRA E CONSELLERÍA DE ECONOMÍA, INDUSTRIA E INNOVACIÓN E A ASOCIACIÓN GALEGA DO HIDRÓXENO PARA O IMPULSO E PROMOCIÓN DA ALIANZA INDUSTRIAL GALEGA DO HIDRÓXENO VERDE

REUNIDOS

Dunha parte, _____, en nome e representación da Vicepresidencia Primeira e Consellería de Economía, Industria e Innovación, co NIF _____ e domicilio en Edificio Administrativo San Caetano, s/n, 15704, Santiago de Compostela, na súa calidade de vicepresidente primeiro e conselleiro. Está facultado para este acto en virtude das facultades que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia e o Decreto 116/2022, do 23 de xuño, polo que se establece a estrutura orgánica da Vicepresidencia Primeira e Consellería de Economía, Industria e Innovación (DOG núm. 126, do 4 de xullo).

Doutra parte, _____, en nome e representación da Asociación Galega do Hidróxeno, co NIF _____, inscrita no Rexistro Central de Asociacións co número _____, e domicilio _____ en A Coruña. Comparece na súa calidade de presidente da dita asociación, actuando en nome e representación da entidade, en virtude do seu nomeamento como presidente por acordo da Asamblea Xeral, na súa sesión celebrada o 31 de maio de 2023.

Interveñen en función dos seus respectivos cargos e no exercicio das facultades que, para convir en nome das entidades que representan, teñen conferidas e

EXPOÑEN

I.- Que a Vicepresidencia Primeira e Consellería de Economía, Industria e Innovación (Decreto 116/2022, do 23 de xuño) é o órgano da Administración xeral da Comunidade Autónoma de Galicia ao cal lle corresponde o exercicio, entre outras, de funcións en materia de promoción e dinamización da economía, impulso e coordinación da política económica e industrial, apoio ao sector empresarial e mellora da competitividade das empresas, incidindo na transformación dixital empresarial e na sostibilidade industrial, así como as relativas a enerxía, investigación, desenvolvemento e innovación.

II.- Que o Decreto 116/2022, do 23 de xuño, polo que se establece a estrutura orgánica da Vicepresidencia Primeira e Consellería de Economía, Industria e Innovación (DOG núm. 126, do 4 de xullo) dispón a creación da Secretaría Xeral de Industria como novo órgano de dirección, ao que se lle atribúen, entre outras, as seguintes funcións: o desenvolvemento, a promoción e coordinación da política industrial dentro da Comunidade Autónoma de Galicia en colaboración

cos distintos departamentos da Xunta de Galicia; a identificación das actividades industriais que, pola súa relevancia no ámbito tecnolóxico, innovador ou potencial para xerar cadeas de valor competitivas, concentran as oportunidades de negocios futuros; e a interlocución, no ámbito industrial, cos diferentes axentes económicos e sociais con representatividade no territorio da Comunidade Autónoma de Galicia.

III.- Que a Asociación Galega do Hidróxeno, constituída ao abeiro da Lei Orgánica 1/2002, reguladora do dereito de asociación, é unha entidade sen ánimo de lucro, con personalidade xurídica propia e plena capacidade de obrar de acordo coa lexislación vixente, e que ten como obxectivos principais a promoción e o desenvolvemento do hidróxeno renovable en Galicia.

Ademais, coa súa acción pretende cumprir cos seguintes fitos: converter Galicia nunha das rexións europeas líderes en xeración de enerxía renovable e hidróxeno verde; potenciar a participación das pemes e empresas galegas na fabricación de todo tipo de compoñentes ligados á cadea de valor do hidróxeno; potenciar o I+D+i enerxético de Galicia; impulsar proxectos onde se reduzan as emisións de CO₂ e propiciar un marco regulatorio de certificacións, normativas e de formación.

IV.- Que o Plan Estratéxico da Asociación Galega do Hidróxeno establece as súas principais liñas de actuación para o período 2022-2025. Neste tempo a asociación aspira a converterse na plataforma de referencia do sector do hidróxeno en Galicia nos eidos da formación e divulgación social, fomento da investigación, organización do sector e asesoramento estratéxico das administracións competentes.

V.- Que, en liña coa Alianza Europea por un Hidróxeno Limpo, promoveuse por parte da Vicepresidencia Primeira e Consellería de Economía, Industria e Innovación, en colaboración coa Asociación Galega do Hidróxeno e doutros grupos empresariais que forman parte da cadea de valor galega do hidróxeno renovable, unha Alianza estratéxica en torno ao hidróxeno verde en Galicia: a Alianza Industrial Galega do hidróxeno verde, asinada o 21 de decembro de 2022.

VI.- Que entre os obxectivos da dita alianza destacan os seguintes: o deseño e posta en marcha de ferramentas e instrumentos de apoio específicos para o desenvolvemento do sector industrial do hidróxeno como vector enerxético necesario para a descarbonización da economía; a identificación e mapeo de oportunidades en toda a cadea de valor que se xera, na industria, en torno ao hidróxeno renovable; a promoción da formación especializada en empresas; o fomento da investigación e o desenvolvemento de solucións innovadoras para a industria en torno ao hidróxeno verde; e impulsar a necesidade de establecer a infraestrutura necesaria para a execución do corredor atlántico do hidróxeno, no marco do *REPowerUE*.

VII.- Que para a consecución dos obxectivos enunciados no punto anterior, as partes consideran de mutuo interese establecer fórmulas de colaboración que permitan executar as distintas accións encamiñadas ao cumprimento dos ditos obxectivos. Entre esas fórmulas de colaboración, ao quedar excluída pola natureza das entidades asinantes a celebración dun contrato dos contemplados na Lei 9/2017, do 8 de novembro, de contratos do sector público ou doutro instrumento alleo á natureza estritamente convencional, considérase a máis axeitada a figura do convenio entre unha Administración Pública (a Vicepresidencia Primeira e Consellería de Economía, Industria e Innovación) e un suxeito de Dereito privado (a Asociación Galega do

Hidróxeno), ao abeiro do artigo 47.2 letra c) da Lei 40/2015, do 1 de outubro, de réxime xurídico do sector público.

Por todo o exposto, ambas partes acordan subscribir o presente convenio, que se rexerá polas seguintes:

CLÁUSULAS

Primeira.- Obxecto

O obxecto deste convenio é instrumentar e regular as condicións específicas que rexerán entre a Vicepresidencia Primeira e Consellería de Economía, Industria e Innovación e a Asociación Galega do Hidróxeno para o desenvolvemento das seguintes actividades:

1. Elaboración do mapa de capacidades industriais de Galicia en torno ao hidróxeno verde, mediante a realización previa de seminarios temáticos con integrantes do sector e posterior tarefa de análise e elaboración do instrumento.
2. Asistencia a xornadas e reunións internacionais sobre o hidróxeno para dar a coñecer e impulsar a Alianza Industrial Galega do Hidróxeno Verde.
3. Promoción de proxectos empresariais en torno á cadea de valor do hidróxeno verde, a través de reunións de networking.
4. Realización de estudos legislativos/regulatorios destinados a ampliar coñecemento e facilitar a implantación de proxectos de hidróxeno renovable.
5. Posta en marcha da Oficina técnica da Alianza Industrial Galega do Hidróxeno Verde, órgano técnico de apoio aos comités executivos que se constitúan ao amparo da Alianza.
6. Apoio na dotación de infraestruturas de hidróxeno en centros de formación, co obxectivo de impulsar a formación especializada en materia de hidróxeno verde.

Segunda.- Obrigas da Vicepresidencia Primeira e Consellería de Economía, Industria e Innovación

1. Colaborar no desenvolvemento daquelas iniciativas e accións vinculadas ao obxecto do convenio para asegurar o seu cumprimento.
2. Financiar o 100% das actividades obxecto deste convenio establecidas na cláusula primeira, ata a contía máxima que se recolle na cláusula cuarta.
3. Supervisar que as actividades sexan desenvolvidas de acordo coas estipulacións do presente convenio e ditar as instrucións que se estimen precisas para a referida colaboración.

Terceira.- Obrigas da Asociación Galega do Hidróxeno

1. Desenvolver as actividades obxecto do convenio, seguindo as liñas de actuación establecidas na cláusula primeira.
2. Con carácter previo á sinatura deste convenio e xunto coa solicitude de pagamento, deberá acreditar ante a Vicepresidencia Primeira e Consellería de Economía, Industria e Innovación que se atopa ao corrente das súas obrigas tributarias e fronte á Seguridade Social e que non ten pendente de pagamento ningunha outra débeda coa Administración Pública da Comunidade Autónoma, no caso de que se opoña á consulta automatizada por parte da Vicepresidencia Primeira e Consellería de Economía, Industria e Innovación, segundo o disposto na cláusula décimo terceira deste convenio.
3. Facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas ou o Consello de Contas, no exercicio das súas respectivas funcións de fiscalización e control de destino dos fondos transferidos e facilitar a inspección e control dos órganos da Vicepresidencia Primeira e Consellería de Economía, Industria e Innovación co fin de supervisar o cumprimento das actividades do convenio.
4. Seguir as normas sobre protección de datos, concretamente a Lei orgánica 3/2018, de 5 de decembro, de protección de datos persoais e garantía dos dereitos dixitais.
5. Achegar os informes e documentos que acrediten o desenvolvemento das actividades do presente convenio, así como os informes e demais documentos requiridos pola Vicepresidencia Primeira e Consellería de Economía, Industria e Innovación.
6. Facer constar expresamente a colaboración prestada pola Vicepresidencia Primeira e Consellería de Economía, Industria e Innovación, en todo o material de execución, información e publicidade das actividades do convenio, coa utilización do correspondente logotipo identificativo, en virtude do disposto no Manual de Identidade Corporativa da Xunta de Galicia.

Cuarta.- Contía da achega económica

Para o desenvolvemento das actuacións previstas no convenio, a Vicepresidencia Primeira e Consellería de Economía, Industria e Innovación achegará á Asociación Galega do Hidróxeno a cantidade máxima de 149.950 € con cargo á partida orzamentaria 05.02.732A.640.8, código de proxecto 2023 00006, do seu orzamento de gastos para o ano 2023.

Esta achega económica realizarase como unha compensación dos gastos nos que incorra a Asociación Galega do Hidróxeno para a axeitada execución das accións obxecto do convenio. En ningún caso se aboarán importes que supoñan a obtención de lucro por parte da dita asociación.

Quinta.- Gastos atendibles

Con carácter xeral, considéranse gastos atendibles aos efectos do convenio, aqueles que de xeito indubidable responden á natureza das actividades e fins do convenio.

Requisitos dos gastos con cargo ao convenio:

Os gastos deberán ser realizados, facturados e efectivamente pagados dentro do ámbito temporal do propio convenio e, polo tanto, no que atinxe unicamente a actuacións realizadas entre o 1 de xaneiro e a data de xustificación, de conformidade cos prazos sinalados na cláusula sexta.

O importe do IVE (imposto do valor engadido) non se considerará gasto xustificable cando sexa susceptible de recuperación ou compensación, salvo que se acredite a exención do mesmo e consecuentemente non resulte recuperable.

Todos os gastos externos iguais ou superiores aos 3.000 euros, IVE excluído, deben ser notificados á Vicepresidencia Primeira e Consellería de Economía, Industria e Innovación antes da súa contratación.

Os gastos nos que incorra a Asociación Galega do Hidróxeno serán compatibles con outras cantidades públicas ou privadas que puidese recibir, que deberán ser declaradas nas liquidacións do convenio, e diminuirán o importe total a achegar pola Vicepresidencia Primeira e Consellería de Economía, Industria e Innovación.

Todos os gastos externos xustificados pola Asociación Galega do Hidróxeno deben axustarse a prezos de mercado, polo que podería solicitarse unha auditoría sobre os gastos xustificados, no caso de que non exista outro patrón de público coñecemento que permita establecer o dito axuste.

Sexta.- Xustificación e pagamento das contribucións da Vicepresidencia Primeira e Consellería de Economía, Industria e Innovación

1. A Vicepresidencia Primeira e Consellería de Economía, Industria e Innovación achegará para o financiamento do custo das accións previstas no presente convenio un importe total máximo de cento corenta e nove mil novecentos cincuenta euros (149.950 €). Esta cantidade será aboada con cargo aos orzamentos da Xunta de Galicia para o ano 2023, nos que se dotará crédito axeitado e suficiente para financiar ata o 100% esta achega, conforme á partida orzamentaria 05.02.732A.640.8.

2. A contribución da Vicepresidencia Primeira e Consellería de Economía, Industria e Innovación será aboada sempre que se acredite ante a Secretaría Xeral de Industria a execución das accións enunciadas na cláusula primeira pola Asociación Galega do Hidróxeno.

3. Para a acreditación á que se refire o punto anterior, a Asociación Galega do Hidróxeno presentará á Secretaría Xeral de Industria, unha vez finalizadas actividades que se detallan na cláusula primeira deste Convenio, e en todo caso como data límite o 15 decembro de 2023:

3.1. Unha relación clasificada dos gastos nos que se incorreu, coa identificación do concepto de gasto, acredor e do documento, o seu importe, data de emisión e data de pagamento.

3.2. As facturas e demais documentos de valor probatorio equivalente no tráfico xurídico-mercantil ou con eficacia administrativa, así como os xustificantes das transferencias

bancarias, certificacións bancarias ou extractos bancarios, ou documentos obtidos a través da banca electrónica sempre que contén co selo do banco, acreditativas dos pagamentos polos servizos realizados.

En ningún caso serán admisibles os pagamentos xustificados mediante recibo do proveedor. Nestes documentos deberán estar claramente identificados o receptor e o emisor do pagamento, o número e a satisfacción do importe total da factura (IVE incluído), así como o concepto a que se refiren. No caso de que no documento de pagamento non se faga referencia ás facturas, deberá ir acompañado da documentación complementaria que permita verificar a correspondencia entre gasto e pagamento. No caso de que un xustificante de pagamento inclúa varias facturas, achegarse unha relación detallada das mesmas na que se poida apreciar que o pagamento se corresponda coas ditas facturas.

3.3. Tres ofertas de diferentes provedores cando o importe de cada gasto no que incorra a Asociación Galega do Hidróxeno sexa igual ou superior a 15.000 €, IVE excluído. Cando polas especiais características dos gastos non exista no mercado suficiente número de entidades que o presten ou subministren, deberá achegarse unha xustificación de tal circunstancia. Se a elección entre as ofertas presentadas non tivese recaído na proposta económica máis vantaxosa, deberá achegarse unha memoria xustificativa.

3.4. Certificacións expedidas polas respectivas Administracións Públicas, que acrediten que se está ao corrente das obrigas tributarias e da Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma ou autorización para que a Secretaría de Industria da Vicepresidencia Primeira e Consellería de Economía, Industria e Innovación realice estas consultas polos seus propios medios.

No suposto de que o importe do IVE supoña un custo real soportado, poderá ser incluído na solicitude de pagamento. Neste caso, deberá presentarse un certificado oficial expedido pola AEAT, acreditativo da situación da entidade con respecto ao IVE.

3.5. Unha memoria final onde se xustifique o cumprimento dos obxectivos previstos e no que se describan de xeito individualizado as distintas accións desenvolvidas, resultados obtidos e as incidencias máis significativas no marco deste convenio. Nos casos nos que sexa posible, empregaranse indicadores obxectivos para medir o impacto logrado a través de cada acción: número de seminarios temáticos, número de xornadas e reunións internacionais, número de asistentes a eventos, número de integrantes do sector nos eventos, número de reunións de networking, número de estudos legislativos/regulatorios, número de comités executivos e demais actuacións realizadas.

3.6. No caso daquelas accións nas que se elabore documentación, materiais gráficos, folletos, fotografías ou calquera outro material en formatos analóxicos ou dixitais, xuntarase unha copia dos mesmos ou a ligazón a webs e outros espazos virtuais relevantes nos que poida acreditarse a súa existencia.

3.7. -Declaración da titularidade da conta bancaria onde se debe realizar o pagamento.

4. A Asociación Galega do Hidróxeno responsabilizarase da veracidade dos documentos presentados. Coa solicitude de pagamento deberá achegarse unha declaración responsable de que non existe ánimo de lucro e que os importes reclamados se circunscriben á satisfacción dos gastos nos que teña incorrido para a execución das actividades obxecto deste convenio. Esta declaración responsable deberá estar asinada dixitalmente pola persoa que ostente a representación legal da entidade.

5. En todo caso, a Vicepresidencia Primeira e Consellería de Economía, Industria e Innovación, a través da Secretaría Xeral de Industria, resérvase o dereito de solicitar toda a documentación que se considere precisa en relación coa realización das actuacións obxecto do presente convenio e calquera outra que estime oportuna para a correcta xustificación do gasto e o seu pagamento.

6. A Asociación Galega do Hidróxeno manterá a disposición da Vicepresidencia Primeira e Consellería de Economía, Industria e Innovación ou de calquera organismo público con capacidade de fiscalización da Comunidade Autónoma de Galicia, tales como a Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación *in situ*, ben por medios propios ou mediante auditor externo. O prazo para a comprobación material de facturas e xustificantes de gasto será de 5 anos desde a finalización do prazo de vixencia do convenio.

Sétima.- Comisión de seguimento

Para facilitar a execución e desenvolvemento, así como o seguimento e cumprimento do presente convenio, constituirase unha comisión paritaria, formada por dous/dúas representantes de cada parte asinante. Esta Comisión actuará como órgano de vixilancia, seguimento e control do establecido neste convenio. Así mesmo, esta comisión supervisará a programación das accións concretas ás que se refire o convenio e avaliará e controlará as actividades realizadas.

A comisión reunirse en sesión constitutiva nun prazo non superior a un mes desde a sinatura deste convenio. Así mesmo, reunirse tantas veces como o soliciten as partes para analizar o grao de cumprimento dos obxectivos fixados, propor a resolución dos conflitos específicos que puidesen exporse e realizar calquera outra actuación de coordinación que se estime precisa.

O presidente da Comisión, que será un dos representantes da Vicepresidencia Primeira e Consellería de Economía, Industria e Innovación, terá voto dirimente.

O funcionamento da Comisión de Seguimento farase ao abeiro do réxime xurídico dos órganos colexiados contido na sección III, co capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

Oitava.- Vixencia e causas de resolución

Este convenio entrará en vigor o día da súa sinatura e terá vixencia ata o 30 de decembro de 2023.

Admitiranse actividades do presente convenio anteriores a súa sinatura levadas a cabo dende o 1 de xaneiro de 2023.

O convenio extinguirase polo cumprimento das actuacións que constitúen o seu obxecto ou por incorrer en causa de resolución. Son causas de resolución:

- a) O transcurso do prazo de vixencia do convenio.
- b) O acordo unánime de todos os asinantes.
- c) O incumprimento das obrigas e compromisos asumidos por parte dalgún dos asinantes. Neste caso, calquera das partes poderá notificar á parte incumpridora un requirimento para que cumpra nun prazo de 10 días hábiles coas obrigas ou compromisos que se consideren incumpridos. Este requirimento será comunicado á Comisión de Seguimento do convenio e ás demais partes asinantes. Se transcorrido o prazo indicado no requirimento persistira o incumprimento, a parte que o dirixiu notificará ás partes asinantes a concorrencia da causa de resolución e entenderase resolto o convenio.
- d) Por decisión xudicial declaratoria da nulidade do convenio.
- e) Introducción de modificacións substanciais sen que as mesmas se aceptasen pola Comisión de seguimento.
- f) Por calquera outra causa distinta das anteriores prevista no convenio ou noutras leis.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de seguimento do convenio, acordarán a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.

Novena.- Modificación

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sostibilidade financeira. A dita modificación terá por obxecto a redución do volume das obrigas ou a ampliación do seu prazo de execución.

Décima.- Publicidade da subscrición do convenio

De conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006 de 20 de xullo, polo que se regula o Rexistro de Convenios da Xunta de Galicia, a Vicepresidencia Primeira e Consellería de Economía, Industria e Innovación publicará no Diario Oficial de Galicia, no Portal de transparencia e Goberno aberto e na súa páxina web oficial o importe da prestación económica concedida ao abeiro deste convenio e a entidade destinataria desta, e incluírá igualmente a referida contribución e as sancións que como consecuencia deste puidesen impoñerse nos correspondentes rexistros públicos, polo que a sinatura do convenio leva implícita a autorización para o tratamento necesario dos datos da entidade e a referida publicidade, así como a súa cesión aos órganos competentes da Vicepresidencia Primeira e Consellería de Economía, Industria e Innovación.

A Asociación Galega do Hidróxeno deberá subministrar toda a información necesaria para que a Vicepresidencia Primeira e Consellería de Economía, Industria e Innovación poida dar cumprimento ás obrigas previstas no Título I da Lei 1/2016, do 18 de xaneiro, de transparencia e

bo goberno. As consecuencias do incumprimento desta obriga serán as establecidas no artigo 4.4 da citada lei.

Undécima.- Propiedade intelectual

A documentación xerada como consecuencia da execución deste convenio será propiedade conxunta da Asociación Galega do Hidróxeno e a Vicepresidencia Primeira e Consellería de Economía, Industria e Innovación. Na medida en que a mesma sexa susceptible de protección mediante o réxime da propiedade intelectual, seralles de aplicación o disposto no artigo 7 do Texto refundido da propiedade intelectual, relativo á obra en colaboración.

A titularidade de todos os dereitos de propiedade intelectual inherentes á documentación elaborada será da Asociación Galega do Hidróxeno e da Vicepresidencia Primeira e Consellería de Economía, Industria e Innovación por ámbito mundial e polo prazo de protección dos dereitos de propiedade intelectual, de acordo coa normativa nacional e comunitaria aplicable.

Duodécima.- Responsabilidade

A subscrición do presente convenio non implicará relación laboral contractual ou de calquera outro tipo entre os profesionais ou entidades que vaian desenvolver as actuacións obxecto deste convenio e a Vicepresidencia Primeira e Consellería de Economía, Industria e Innovación, de tal xeito que non se poderá esixir a esta responsabilidade ningunha, nin directa nin subsidiariamente, polos actos ou feitos acaecidos no desenvolvemento do devandito convenio.

Décimo terceira.- Autorizacións

A Asociación Galega do Hidróxeno consente expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, así como poderá exercer os seus dereitos de acceso, rectificación cancelación e oposición respecto do contido dos rexistros antes citados, ante a Vicepresidencia Primeira e Consellería de Economía, Industria e Innovación, con sede no complexo administrativo de San Caetano s/n, 15704, Santiago de Compostela.

Este consentimento esténdese á autorización para a cesión dos seus datos á entidade financeira na que se aboe o pagamento, ao *Diario Oficial de Galicia* e ás demais cesións previstas na lei.

Tamén comporta a autorización á Vicepresidencia Primeira e Consellería de Economía, Industria e Innovación para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.

Décimo cuarta.- Natureza e normativa

O presente convenio ten natureza administrativa quedando fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE, do 26 de febreiro de 2014, de conformidade co seu artigo 6, sen prexuízo da aplicación dos

principios desta lei para resolver as dúbidas e lagoas que puidesen presentarse, consonte o previsto no seu artigo 4.

As partes comprométense a resolver de común acordo, ante a Comisión de seguimento, calquera controversia que puidese suscitarse sobre a interpretación ou execución deste convenio. En caso de conflito as partes acordan o sometemento á Xurisdición Contencioso-Administrativa.

Para todo o non previsto neste convenio aplicarase o previsto na Lei 16/2010, de 17 de decembro, de organización e funcionamento da Administración Xeral e do sector público autonómico de Galicia, a Lei 40/2015, do 1 de outubro, de réxime xurídico do sector público, así como na Resolución do 8 de abril de 1991 (DOG nº 82, do 30 de abril) pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, en todo o que non se opoña á Lei 1/2016, do 18 de xaneiro.

E en proba de conformidade, as partes asinan o presente convenio.

En Oleiros, a 31 de maio de 2023.

Pola Vicepresidencia Primeira e Consellería de Economía, Industria e Innovación: Pola Asociación Galega do Hidróxeno: